

Na osnovu člana 146. stav 3. i člana 159. tačka 5) Zakona o zaštiti od požara i vatrogastvu ("Službene novine Federacije BiH", broj 64/09), direktor Federalne uprave civilne zaštite donosi

**PRAVILNIK
O SADRŽAJU I NAČINU VRŠENJA INSPEKCIJSKOG NADZORA IZ OBLASTI ZAŠTITE
OD POŽARA I VATROGASTVA IZ NADLEŽNOSTI FEDERALNE UPRAVE CIVILNE
ZAŠTITE**

(„Službene novine Federacije BiH“, br. 22/16)

DIO PRVI - OSNOVNE ODREDBE

Član 1.

(Predmet pravilnika)

Ovim pravilnikom uređuje se sadržaj, način vršenja inspeksijskog nadzora iz oblasti zaštite od požara i oblasti vatrogastva iz nadležnosti Federalne uprave civilne zaštite (u daljem tekstu: Federalna uprava), subjekti nadzora, sadržaj inspeksijskog nadzora, način vršenja inspeksijskog nadzora, propisi koji se koriste za vršenje inspeksijskog nadzora, priprema i stručno osposobljavanje inspektora za vršenje inspeksijskog nadzora, evidencije o izvršenim inspeksijskim nadzorima i način primjene ovog pravilnika na vršenje inspeksijskog nadzora iz nadležnosti kantonalnih uprava civilne zaštite u Federaciji Bosne i Hercegovine (u daljem tekstu: Federacija).

Član 2.

(Primjena pravilnika)

Ovaj pravilnik primjenjuje se na postupak vršenja inspeksijskog nadzora iz oblasti zaštite od požara i oblasti vatrogastva iz nadležnosti Federalne uprave utvrđen u članu 145. Zakona o zaštiti od požara i vatrogastvu ("Službene novine Federacije BiH", broj 64/09, u daljem tekstu: Zakon).

Član 3.

(Predmet inspeksijskog nadzora iz oblasti zaštite od požara)

Inspeksijski nadzor iz oblasti zaštite od požara obuhvata nadzor organizovanja i provođenja preventivnih mjera zaštite od požara, u skladu sa Zakonom i podzakonskim propisima donesenim na osnovu tog zakona, osim u pitanjima koja su u nadležnosti federalne i kantonalne inspekcije zaštite od požara koja se organizuje u okviru Federalnog i kantonalnih ministarstava unutrašnjih poslova, te u okviru kantonalne uprave civilne zaštite.

Član 4.

(Predmet inspeksijskog nadzora iz oblasti vatrogastva)

Inspeksijski nadzor iz oblasti vatrogastva obuhvata nadzor u odnosu na organizovanje i funkcionisanje vatrogastva i vatrogasne djelatnosti, u skladu sa odredbama Zakona i podzakonskim propisima donesenim na osnovu tog zakona, osim u pitanjima koja su u nadležnosti kantonalne inspekcije za vatrogastvo, koja se organizuje u okviru kantonalnih uprava civilne zaštite.

Član 5.

(Rodna ravnopravnost)

Izrazi koji se u ovom pravilniku koriste u muškom rodu, odnose se jednako na osobe muškog i ženskog spola.

Član 6.

(Ovlaštena lica za vršenje inspeksijskog nadzora)

(1) Poslove inspeksijskog nadzora iz oblasti zaštite od požara i oblasti vatrogastva iz nadležnosti Federalne uprave vrše federalni inspektori i to:

- a) poslove inspekcije iz oblasti zaštite od požara utvrđene u članu 145. stav 2. Zakona, vrše federalni inspektori za zaštitu od požara;
- b) poslove inspekcije iz oblasti vatrogastva utvrđene u članu 145. stav 3. Zakona, vrše federalni inspektori za vatrogastvo.

(2) Radna mjesta inspektora iz stava (1) ovog člana utvrđuju se u Pravilniku o unutrašnjoj organizaciji Federalne uprave, u skladu sa članom 146. Zakona.

Član 7.

(Iskaznica inspektora)

(1) Federalni inspektori za zaštitu od požara i federalni inspektori za vatrogastvo (u daljem tekstu: federalni inspektori) imaju iskaznicu inspektora koju izdaje direktor Federalne uprave.

(2) Iskaznica inspektora iz stava (1) ovog člana izrađuje se prema Pravilniku o obliku i sadržaju iskaznice inspektora organa uprave u Federaciji Bosne i Hercegovine ("Službene novine Federacije BiH", broj 15/08).

(3) Iskaznica inspektora služi za dokazivanje službenog svojstva identiteta federalnog inspektora i da je ovlašten za vršenje inspeksijskog nadzora iz oblasti zaštite od požara odnosno oblasti vatrogastva, u skladu sa članom 145. Zakona.

(4) Federalni inspektor je dužan nositi iskaznicu inspektora sa sobom kada vrši inspeksijski nadzor i pokazati je rukovodiocu organa, upravne organizacije, drugog državnog organa Federacije, kantona, grada i općine ili odgovornom licu u pravnom licu (u daljem tekstu: rukovodilac subjekta nadzora), odnosno službenom licu koje je određeno da prisustvuje vršenju inspeksijskog nadzora ispred subjekta nadzora.

DIO DRUGI - ORGANI UPRAVE, DRUGI ORGANI I PRAVNA LICA U KOJIMA FEDERALNA INSPEKCIJA VRŠI INSPEKCIJSKI NADZOR

Član 8.

(Inspeksijski nadzor u organima i pravnim licima)

Federalni inspektori iz Federalne uprave, poslove inspeksijskog nadzora iz nadležnosti Federalne uprave utvrđene u članu 145. Zakona vrše u organima i pravnim licima utvrđenim u odredbama čl. 9. i 10. ovog pravilnika.

Član 9.

(Organi i pravna lica u kojima Federalna inspekcija za zaštitu od požara vrši inspeksijski nadzor)

(1) Federalna inspekcija za zaštitu od požara vrši poslove inspeksijskog nadzora u odnosu na pitanja utvrđena članom 145. stav 2. Zakona, u sljedećim organima i pravnim licima:

a) u federalnim organima uprave i drugim organima Federacije i to: stručnim službama Parlamenta Federacije Bosne i Hercegovine, Vladi Federacije Bosne i Hercegovine, Uredu predsjednika i potpredsjednika Federacije Bosne i Hercegovine, Vrhovnom sudu Federacije Bosne i Hercegovine, Ustavnom sudu Federacije Bosne i Hercegovine, Federalnom tužilaštvu, Federalnom pravobranilaštvu, federalnim organima uprave (ministarstva, uprave i upravne organizacije) i drugim službama i organima osnovanim na nivou Federacije;

b) pravnim licima od značaja za Federaciju koja su određena u Procjeni ugroženosti Federacije Bosne i Hercegovine od prirodnih i drugih nesreća;

c) u kantonalnim organima uprave i drugim organima kantona i to: skupštini kantona, vladi kantona, kantonalnom sudu, kantonalnom tužilaštvu, kantonalnom pravobranilaštvu i kantonalnim organima uprave (ministarstva, uprave i upravne organizacije) i drugim organima osnovanim na nivou kantona.

(2) Izuzetno, u skladu sa uslovima utvrđenim u članu 8. Zakona, federalna inspekcija za zaštitu od požara može vršiti inspeksijski nadzor u oblasti zaštite od požara u građevinama i prostorima organa i institucija Bosne i Hercegovine i Oružanih snaga Bosne i Hercegovine koje se nalaze na području Federacije, ako propisima Bosne i Hercegovine nije drugačije određeno.

Član 10.

(Organi i pravna lica u kojima Federalna inspekcija za vatrogastvo vrši inspeksijski nadzor)

Federalna inspekcija za vatrogastvo vrši poslove inspeksijskog nadzora u odnosu na pitanja utvrđena članom 145. stav 3. Zakona, u sljedećim organima i pravnim licima:

a) u kantonalnim upravama civilne zaštite koje su osnovale vlastitu ili zajedničku profesionalnu vatrogasnu jedinicu na nivou kantona za potrebe kantona za sve ili pojedine općine/grad sa područja kantona;

- b) općinama/gradu koji su formirali vlastitu profesionalnu vatrogasnu jedinicu, osim u pitanjima koja su Zakonom stavljena u nadležnost kantonalne inspekcije za vatrogastvo iz kantonalne uprave civilne zaštite;
- c) pravnim licima od značaja za Federaciju iz člana 9. stav (1) tačka b) ovog pravilnika, ukoliko su u njima formirane vatrogasne jedinice;
- d) dobrovoljnim vatrogasnim društvima na nivou kantona, ukoliko je u njima formirana dobrovoljna vatrogasna jedinica na nivou kantona za potrebe kantona za sve ili pojedine općine/grad sa područja kantona.

Član 11.

(Subjekti nadzora)

Za organe, službe i pravna lica iz čl. 9. i 10. ovog pravilnika, u daljem tekstu ovog pravilnika koristi se zajednički naziv - subjekti nadzora.

DIO TREĆI - SADRŽAJ INSPEKCIJSKOG NADZORA IZ OBLASTI ZAŠTITE OD POŽARA I VATROGASTVA

1. Federalna inspekcija za zaštitu od požara

Član 12.

(Sadržaj inspekcijskog nadzora iz oblasti zaštite od požara)

(1) Federalna inspekcija za zaštitu od požara, u skladu sa članom 145. stav 2. Zakona, vrši inspekcijski nadzor kod subjekata nadzora iz člana 9. ovog pravilnika, koji obuhvata naročito sljedeća pitanja:

- 1) da li su i na koji način organizovali vršenje poslova zaštite od požara radi zaštite ljudstva i materijalnih dobara koja koriste u svom radu;
- 2) da li imaju donesen plan zaštite od požara za svoje građevine i prostore u skladu sa Uredbom o sadržaju i načinu izrade planova zaštite i spašavanja od prirodnih i drugih nesreća i planova zaštite od požara ("Službene novine Federacije BiH", broj 8/11), te da li izvršavaju zadatke utvrđene u planu zaštite od požara iz člana 22. stav 1. Zakona koji se na njih odnose;
- 3) da li imaju donesen opći akt (pravilnik zaštite od požara) kojim su uređena pitanja koja se odnose na organizaciju i funkcionisanje zaštite od požara i da li opći akt sadrži sva pitanja koja su utvrđena u članu 24. Zakona, te da li su sva zaposlena lica upoznata sa sadržajem tog općeg akta;
- 4) da li su u skladu sa općim aktom, odredili zaposleno lice koje ispunjava uslove propisane Zakonom, da se stara za provođenje mjera zaštite od požara, odnosno da li su formirali stručnu službu zaštite od požara;
- 5) da li se provode opće mjere zaštite od požara iz člana 27. st. 1. i 2. Zakona, kao i druge preventivne mjere zaštite od požara;
- 6) da li se pri izradi dokumenata prostornog uređenja Federacije (prostorni plan, prostorni plan područja posebnih obilježja) izrađuje elaborat zaštite od požara u kojem se predviđaju i razrađuju prostorne i tehničke mjere zaštite od požara u skladu sa članom 28. Zakona;
- 7) da li se za građevine iz člana 31. stav 1. Zakona izrađuje elaborat zaštite od požara i da li taj elaborat sadrži podatke i činjenice utvrđene u stavu 2. tog člana te da li se u postupku izdavanja upotrebne dozvole za te građevine, u komisiju za tehnički pregled imenuje član za oblast zaštite od požara, u skladu sa članom 38. Zakona;
- 8) da li imaju pribavljenu potvrdu o ispravnosti i funkcionalnosti sistema aktivne zaštite od požara koji su izvedeni u njihovim građevinama i prostorima prije početka upotrebe tih sistema, kao i da li obavljaju periodična ispitivanja ispravnosti i funkcionalnosti tih sistema, u skladu sa članom 47. stav 1. i članom 48. Zakona i Pravilnikom o obimu i postupku provjere i ispitivanja ispravnosti i funkcionalnosti ugrađenog sistema aktivne zaštite od požara, uslovima koje moraju ispunjavati pravna lica koja vrše poslove ispitivanja ispravnosti i funkcionalnosti, kao i programu i načinu polaganja stručnog ispita za vršenje tih poslova ("Službene novine Federacije BiH", broj 69/13), drugim tehničkim propisima i upustvom proizvođača;
- 9) da li obavljaju redovne i periodične preglede, kao i kontrolna ispitivanja ispravnosti i funkcionalnosti aparata za gašenje početnog požara raspoređenih u njihovim građevinama i

prostorima, u skladu sa Pravilnikom o izboru i održavanju aparata za gašenje početnog požara koji se mogu stavljati u promet sa garantnim rokom i rokom servisiranja ("Službene novine Federacije BiH", broj 46/11);

10) da li održavaju u ispravnom stanju unutrašnju i vanjsku hidrantsku mrežu izvedenu u njihovim građevinama i prostorima, odnosno da li vrše kontrolu ispravnosti te mreže i o tome vode odgovarajuću evidenciju u skladu sa članom 49. stav 3. Zakona;

11) da li operativnom centru civilne zaštite Federacije i kantona dostavljaju podatke o pojavi požara i eksplozija u svojim građevinama i prostorima i druge potrebne podatke prema članu 54. Zakona i da li vode evidenciju o požarima i eksplozijama na svojim građevinama;

12) da li se predlažu i provode statistička istraživanja iz oblasti zaštite od požara i vatrogastva na području kantona u skladu sa članom 55. Zakona;

13) da li se provodi stručna obuka i osposobljavanje zaposlenih lica za zaštitu od požara iz člana 128. Zakona prema Programu obuke za stručno osposobljavanje pravnih lica, državnih organa i drugih institucija iz oblasti zaštite od požara ("Službene novine Federacije BiH", broj 59/10) i da li se obezbjeđuje polaganje ispita za protivpožarnu zaštitu u skladu sa Programom polaganja ispita za protivpožarnu zaštitu ("Službene novine Federacije BiH", broj 67/13), za zaposlene lica iz tačke 4) ovog člana, odnosno zaposlena lica raspoređena u stručnu službu zaštite od požara;

14) da li zaposlenici koji obavljaju poslove portira (repcionara) imaju položen stručni ispit za dobrovoljnog vatrogasca u skladu sa članom 130. stav 4. Zakona i Programom obuke i osposobljavanja za dobrovoljne vatrogasce, kao i sadržaj i način polaganja stručnog ispita za dobrovoljne vatrogasce ("Službene novine Federacije BiH", broj 37/15);

15) da li u skladu sa članom 131. Zakona, svake godine osiguravaju finansijska sredstva potrebna za organizovanje, provođenje i unapređenje mjera zaštite od požara u svojim građevinama i prostorima, kao i za obučavanje i osposobljavanje svojih zaposlenih lica iz oblasti zaštite od požara;

16) da li su donijeli podzakonske propise iz svoje nadležnosti utvrđene u čl. 158. do 164. Zakona;

17) da li je kanton donio svoj propis u oblasti zaštite od požara i vatrogastva prema članu 165. Zakona kojim se bliže uređuje organizacija i način funkcionisanja zaštite od požara i vatrogastva na području kantona i da li je taj propis usklađen sa Zakonom;

18) da li kantonalna uprava civilne zaštite obavlja sve poslove iz svoje nadležnosti utvrđene u članu 15. Zakona, a posebno da li je donesena procjena ugroženosti od požara od značaja za kanton i plan zaštite od požara kantona;

19) da li su u okviru programa razvoja zaštite i spašavanja ljudi i materijalnih dobara od prirodnih i drugih nesreća kantona utvrdili program razvoja zaštite od požara kantona te da li na osnovu tog programa donose godišnji plan aktivnosti na realizaciji zadataka utvrđenih za razvoj zaštite od požara kantona u skladu sa članom 19. Zakona;

20) da li se izdaje ovlaštenje o ispunjavanju uslova za izvođenje obuke iz oblasti zaštite od požara pravnim licima u skladu sa programom iz tačke 13) ovog člana;

21) da li je formirana kantonalna komisija za polaganje ispita za protivpožarnu zaštitu i da li provodi polaganje tog ispita, izdavanje uvjerenja i vođenje evidencije o položenim ispitima u skladu sa odredbama programa iz tačke 13) ovog člana;

22) da li je organizovana kantonalna inspekcija iz oblasti zaštite od požara i da li inspektori za zaštitu od požara ispunjavaju uslove u skladu sa članom 146. stav 2. Zakona.

(2) Inspekcija iz stava (1) ovog člana vrši inspekciju i u odnosu na druga pitanja koja se odnose na organizaciju i provođenje preventivnih mjera zaštite od požara, a koja se prema Zakonu i podzakonskim propisima odnose na subjekte nadzora iz člana 9. ovog pravilnika.

2. Federalna inspekcija za vatrogastvo

Član 13.

(Sadržaj inspekcijskog nadzora za vatrogastvo)

(1) Federalna inspekcija za vatrogastvo u skladu sa članom 145. stav 3. Zakona, vrši inspekcijski nadzor kod subjekata nadzora iz člana 10. ovog pravilnika koji obuhvata naročito sljedeća pitanja:

- 1) da li su za općinu, grad i kanton osnovane profesionalne vatrogasne jedinice na način utvrđen u čl. 62. do 66. Zakona i da li je osnovanim vatrogasnim jedinicama pokriveno područje svake općine i grada;
- 2) ako je osnovana zajednička profesionalna vatrogasna jedinica za kanton, općinu i grad na području kantona, da li je raspored ispostava te jedinice na terenu prema uslovima iz člana 66. Zakona i procjenom ugroženosti od požara kantona, odnosno općine/grada, kao i planom zaštite od požara kantona, odnosno općine/grada;
- 3) da li se profesionalni vatrogasci u zajedničkoj odnosno profesionalnoj vatrogasnoj jedinici kantona, općine i grada odazivaju pozivu u uslovima iz člana 70. stav 3. Zakona;
- 4) da li se oprema, vozila, tehnička i druga sredstva kojima raspolaže profesionalna vatrogasna jedinica kantona, općine i grada stalno održava u ispravnom stanju i da li se o tome vode propisane evidencije, u skladu sa članom 71. stav 6. Zakona i Pravilnikom o sadržaju i načinu vođenja evidencija u vatrogasnim jedinicama ("Službene novine Federacije BiH", broj 55/11);
- 5) da li profesionalni vatrogasci u zajedničkoj odnosno profesionalnoj vatrogasnoj jedinici kantona, općine i grada imaju službene iskaznice (legitimacije) i da li je nose za vrijeme vatrogasne intervencije i za vrijeme obavljanja službene dužnosti kako je utvrđeno u članu 73. stav 1. Zakona te da li se te iskaznice izdaju u skladu sa Pravilnikom o obliku i sadržaju službene iskaznice (legitimacije) profesionalnog vatrogasca ("Službene novine Federacije BiH", broj 37/15) i o izdatim iskaznicama vodi propisana evidencija;
- 6) da li je materijalna formacija u zajedničkoj odnosno profesionalnoj vatrogasnoj jedinici kantona, općine i grada utvrđena u skladu sa planskim dokumentima iz tačke 2) ovog člana i Pravilnikom o minimumu tehničke opreme i sredstava i rok korištenja te opreme i sredstava za profesionalne i druge vatrogasne jedinice ("Službene novine Federacije BiH", broj 104/12);
- 7) da li su starješine vatrogasnih jedinica i njihovi zamjenici postavljeni, u skladu sa odredbama čl. 75. i 76. Zakona;
- 8) da li su komandiri dobrovoljnih vatrogasnih jedinica postavljeni u skladu sa članom 78. stav 4. Zakona;
- 9) da li starješine zajedničke profesionalne vatrogasne jedinice obezbjeđuju izlazak vatrogasne jedinice kojom rukovode na vatrogasnu intervenciju odmah po primljenoj dojavi o pojavi požara, kao i u slučajevima kada to naredi rukovodilac kantonalne uprave civilne zaštite ili kantonalni štab civilne zaštite iz člana 79. Zakona;
- 10) da li je osnovana dobrovoljna vatrogasna jedinica u uslovima iz člana 82. stav 2. Zakona i u roku koji je utvrđen u planu zaštite od požara kantona;
- 11) da li je u pravnom licu od značaja za Federaciju, osnovana vatrogasna jedinica pravnog lica prema odredbi člana 88. st.1. i 2. Zakona;
- 12) da li starješine zajedničke odnosno profesionalne vatrogasne jedinice kantona, postupaju po naredbama nadležnog štaba civilne zaštite iz čl. 94. i 96. i člana 97. stav 3. Zakona i obezbjeđuju provođenje tih naredbi na terenu;
- 13) da li se postupa po rješenju rukovodioca akcije gašenja požara iz člana 101. st. 1. i 2. Zakona;
- 14) da li su profesionalne vatrogasne jedinice popunjene licima prema uslovima koji su utvrđeni u čl. 105. i 108. Zakona i da li im se staž osiguranja računa u uvećanom trajanju, u skladu sa Odlukom o utvrđivanju radnih mjesta u profesionalnoj vatrogasnoj jedinici na kojima se staž osiguranja računa u uvećanom trajanju i načinu uplate doprinosa za staž osiguranja u uvećanom trajanju ("Službene novine Federacije BiH", broj 8/11);
- 15) da li se vrše obavezne provjere psihofizičke i zdravstvene sposobnosti profesionalnih vatrogasaca i starješina vatrogasnih jedinica u skladu sa čl. 109. i 110. Zakona;
- 16) da li se provodi stručno osposobljavanje i usavršavanje profesionalnih vatrogasaca iz člana 129. Zakona u skladu sa Planom i programom obuke za stručno osposobljavanje, uvježbavanje i kondicioniranje profesionalnih vatrogasaca ("Službene novine Federacije BiH", broj 67/13);
- 17) da li se planiraju i osiguravaju finansijska sredstva u budžetu Federacije BiH, kantona, općine i grada za potrebe vatrogastva prema čl. 134. do 136. Zakona;

18) da li se vrši prikupljanje, raspodjela i korištenje finansijskih sredstava u skladu sa članom 137. Zakona;

19) da li objekti profesionalnih vatrogasnih jedinica ispunjavaju uslove utvrđene u odredbama Pravilnika o uslovima koje moraju ispunjavati objekti za smještaj profesionalnih i dobrovoljnih vatrogasnih jedinica i vatrogasnih jedinica pravnih lica i minimum materijalno - tehničkih sredstava potrebnih za održavanje opreme i sredstava tih jedinica ("Službene novine Federacije BiH", broj 107/12);

20) da li je kantonalna uprava civilne zaštite formirala kantonalnu komisiju za polaganje ispita za profesionalnog vatrogasca te da li se provodi polaganje ispita, izdavanje uvjerenja i vođenje evidencija o položenim ispitima, u skladu sa Uredbom o sadržaju, uslovima i načinu polaganja ispita u oblasti vatrogastva ("Službene novine Federacije BiH", br. 93/12 i 105/14);

21) da li je kantonalna uprava civilne zaštite formirala kantonalnu komisiju za polaganje ispita za dobrovoljne vatrogasce i rukovodioce akcije gašenja požara u dobrovoljnom vatrogastvu, kao i da li se provodi polaganje ispita, izdavanje uvjerenja, vođenje evidencija o položenim ispitima, u skladu sa Programom obuke i osposobljavanja za dobrovoljne vatrogasce, kao i sadržaj i način polaganja stručnog ispita za dobrovoljne vatrogasce ("Službene novine Federacije BiH", broj 37/15);

22) da li profesionalni vatrogasci obavljaju poslove i zadatke iz vatrogasne djelatnosti, u skladu sa Uredbom o pravilima službe za profesionalne i dobrovoljne vatrogasne jedinice i vatrogasne jedinice pravnih lica ("Službene novine Federacije BiH", broj 8/11);

23) da li prilikom obavljanja vatrogasne djelatnosti profesionalni vatrogasci nose uniformu, zaštitnu odjeću i obuću, opremu, u skladu sa Uredbom o uniformi, nazivima funkcija i funkcionalnim oznakama vatrogasaca u profesionalnim i dobrovoljnim vatrogasnim jedinicama, ovlaštenja starješina tih jedinica, zaštitnoj i radnoj odjeći i opremi vatrogasaca ("Službene novine Federacije BiH", broj 8/11);

24) da li je organizovana kantonalna inspekcija iz oblasti vatrogastva i da li inspektori za vatrogastvo ispunjavaju uslove u skladu sa članom 146. stav 2. Zakona.

(2) Federalna inspekcija iz stava (1) ovog člana vrši inspekciju i u odnosu na druga pitanja koja se odnose na organizovanje i funkcionisanje vatrogastva i vatrogasne djelatnosti, a koja se prema Zakonu i podzakonskim propisima odnose na subjekte nadzora iz člana 10. ovog pravilnika.

DIO ČETVRTI - NAČIN VRŠENJA INSPEKCIJSKOG NADZORA

Član 14.

(Način vršenja inspeksijskog nadzora iz oblasti zaštite od požara)

(1) Inspeksijski nadzor iz oblasti zaštite od požara iz člana 12. ovog pravilnika, federalni inspektor za zaštitu od požara vrši putem neposrednog uvida u dokumentaciju kojom raspolaže subjekt nadzora iz člana 9. ovog pravilnika kod kojeg se vrši nadzor.

(2) Inspeksijski nadzor iz stava (1) ovog člana podrazumijeva uvid u opće akte, elaborate, stručne ocjene i mišljenja, spise predmeta, zapisnike, izvještaje, planska dokumenta, planove i programe stručne obuke i osposobljavanja, rješenja, uvjerenja i druge akte koji se odnose na organizovanje i provođenje preventivnih mjera zaštite od požara i drugu dokumentaciju koja se odnosi na zaštitu od požara, kao i neposredan pregled prostorija, instalacija, uređaja, opreme, sredstava i drugih izvedenih tehničkih i drugih mjera koje su u funkciji zaštite od požara u građevinama i prostorima koje subjekt nadzora koristi u svom radu ili čiji je vlasnik.

Član 15.

(Način vršenja inspeksijskog nadzora iz oblasti vatrogastva)

(1) Inspeksijski nadzor iz oblasti vatrogastva iz člana 13. ovog pravilnika, federalni inspektor za vatrogastvo vrši putem neposrednog uvida u dokumentaciju kojom raspolaže subjekt nadzora iz člana 10. ovog pravilnika, kod kojeg se vrši nadzor.

(2) Inspekcijski nadzor iz stava (1) ovog člana podrazumijeva uvid u akte i dokumentaciju koja se odnosi na osnivanje profesionalne vatrogasne jedinice, planska dokumenta – dio koji se odnosi na vatrogastvo, ličnu i materijalnu formaciju, popunjenost jedinice vatrogascima, programe i planove obuka za stručno obučavanje i osposobljavanje vatrogasaca i njihovo kondicioniranje, evidencije, redovne, periodične, kontrolne i druge preglede vatrogasnih vozila, opreme i sredstava, spise predmeta, uvjerenja o položenim ispitima za vatrogasca i rukovodioca akcije gašenja požara, dokumentaciju koja se odnosi na finansiranje vatrogasne jedinice, kao i neposredan pregled objekata u kojima borave profesionalni vatrogasci te prostorija u kojima su smještena vatrogasna vozila, sredstva i oprema sa kojom raspolaže vatrogasna jedinica, radi utvrđivanja da li postoje propisani uslovi za smještaj, održavanje i čuvanje tih vozila, opreme i sredstava.

(3) Pored uvida u dokumentaciju, objekte, opremu i sredstva za pitanja iz stava (2) ovog člana, federalni inspektor za vatrogastvo vrši uvid i u svu drugu dokumentaciju i akte koja se odnose na ostala pitanja za koja je nadležan prema članu 13. ovog pravilnika.

Član 16.

(Cilj vršenja inspekcijskog nadzora)

(1) Neposredan uvid u akte, dokumentaciju, prostore i objekte (građevine) iz čl. 14. i 15. ovog pravilnika vrši se tako da inspektor utvrdi, da li su ti akti i dokumentacija i preduzete mjere i aktivnosti izvršene u skladu sa Zakonom, podzakonskim propisima donesenim na osnovu tog zakona i standardima i normativima iz oblasti zaštite od požara i vatrogastva koji su donijeli nadležni organi Bosne i Hercegovine i Federacije i da li utvrđena organizacija zaštite od požara i organizacija vatrogasne djelatnosti odgovara realnim potrebama subjekta nadzora kod kojeg se vrši taj nadzor.

(2) Neposredni uvid iz stava (1) ovog člana, svaki federalni inspektor vrši za poslove inspekcije za koju je nadležan prema članu 12., odnosno članu 13. ovog pravilnika.

Član 17.

(Pokretanje inspekcijskog nadzora i ovlaštenja inspektora)

(1) Federalni inspektori pokreću inspekcijski nadzor po službenoj dužnosti i vode ga u skladu sa Zakonom o upravnom postupku ("Službene novine Federacije BiH", br. 2/98 i 48/99 u daljem tekstu: ZUP), a u skladu sa ovlaštenjima utvrđenim u odredbama čl. 117. do 132. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05 u daljem tekstu: Zakona o organizaciji organa uprave) i čl. 145. do 147. Zakona i odredbama ovog pravilnika.

(2) Federalni inspektori dužni su u svim slučajevima kada postoji pisani zahtjev za pokretanje inspekcijskog nadzora, izvršiti inspekcijski nadzor u skladu sa stavom (1) ovog člana.

(3) Inspekcijski nadzor federalni inspektor pokreće i po nalogu glavnog inspektora ili po nalogu direktora Federalne uprave, ukoliko glavni federalni inspektor nije postavljen.

Član 18.

(Godišnji program inspekcijskog nadzora)

(1) Inspekcijski nadzor, vrši se prema godišnjem programu inspekcijskog nadzora iz oblasti zaštite od požara, odnosno iz oblasti vatrogastva, koji čini sastavni dio godišnjeg programa inspekcijskog nadzora iz nadležnosti Inspektorata Federalne uprave (u daljem tekstu: Program), koji donosi direktor Federalne uprave na prijedlog glavnog inspektora.

(2) Ako nije postavljen glavni inspektor, Program iz stava (1) ovog člana donosi direktor Federalne uprave, na prijedlog federalnih inspektora za zaštitu od požara - za oblast zaštite od požara i federalnih inspektora za vatrogastvo - za oblast vatrogastva.

(3) Program inspekcijskog nadzora iz oblasti zaštite od požara, odnosno iz oblasti vatrogastva sadrži: naziv subjekta nadzora kod kojeg se vrši inspekcijski nadzor iz čl. 9. i 10. ovog pravilnika, pitanja koja će se obuhvatiti nadzorom i vrijeme vršenja tog nadzora, kao i druga pitanja potrebna za vršenje nadzora.

Član 19.

(Mjesečni plan rada inspekcijskog nadzora i izvještaj o radu)

- (1) Na osnovu programa iz člana 18. ovog pravilnika, federalni inspektori iz člana 6. stav (1) ovog pravilnika, izrađuju svoje mjesečne planove rada svako po pitanjima iz svoje nadležnosti, prema vlastitoj procjeni.
- (2) Mjesečni plan rada donosi glavni inspektor na prijedlog federalnih inspektora iz stava (1) ovog člana ili direktor Federalne uprave, ako nije postavljen glavni inspektor.
- (3) Mjesečni plan rada sadrži, pored ostalog, naziv subjekta nadzora u kome se vrši nadzor, datum vršenja inspekcijskog nadzora, vrstu nadzora i druga potrebna pitanja.
- (4) Federalni inspektori iz stava (1) ovog člana dužni su dostavljati tromjesečni i godišnji izvještaj o svom radu glavnom inspektor ili direktoru Federalne uprave, ako nije postavljen glavni inspektor.

Član 20.

(Vrste inspekcijskog nadzora)

- (1) Inspekcijski nadzor vrši se kao redovni, vanredni ili kontrolni, a po obimu kao potpuni ili djelimični.
- (2) Redovni inspekcijski nadzor, po pravilu, najavljuje se pisanim putem rukovodiocu subjekta nadzora, najmanje sedam dana prije dana predviđenog za vršenje nadzora.
- (3) Redovni inspekcijski nadzor, po pravilu, obuhvata potpuni nadzor svih pitanja koja su obuhvaćena Programom i mjesečnim planom rada iz čl. 18. i 19. ovog pravilnika.
- (4) Vanredni inspekcijski nadzor, u smislu ovog pravilnika, smatra se svaki nadzor koji nije obuhvaćen Programom i mjesečnim planom rada iz čl. 18. i 19. ovog pravilnika.
- (5) Kontrolni inspekcijski nadzor vrši se kod subjekata nadzora kod kojih je prilikom redovnog ili vanrednog inspekcijskog nadzora utvrđeno nezadovoljavajuće stanje iz oblasti zaštite od požara i iz oblasti vatrogastva, kada su naložene određene mjere za otklanjanje utvrđenih nedostataka i nepravilnosti.
- (6) Kontrolni inspekcijski nadzor se vrši, po pravilu, u roku od tri mjeseca od dana isteka roka za otklanjanje nepravilnosti utvrđenih rješenjem kojim su naložene mjere za otklanjanje nedostataka i nepravilnosti.
- (7) Vanredni ili kontrolni nadzor, po pravilu obuhvata djelimični nadzor samo određenih pitanja koja odrede federalni inspektori.

Član 21.

(Nalog za vršenje inspekcijskog nadzora)

- (1) Inspekcijski nadzor federalni inspektori vrše na osnovu naloga za inspekcijski nadzor.
- (2) Nalog inspektor izdaje glavni inspektor ili direktor Federalne uprave, ako nije postavljen glavni inspektor.
- (3) Nalog se izdaje u pisanom obliku i sadrži:
 - a) naziv inspektorata i inspekcije, broj naloga i datum izdavanja;
 - b) naziv subjekta i objekta nad kojim se vrši nadzor;
 - c) predmet inspekcijskog nadzora (lista provjera);
 - d) ime i prezime inspektora koji će izvršiti inspekcijski nadzor;
 - e) naziv službenog vozila i registracijske oznake;
 - f) datum početka vršenja inspekcijskog nadzora;
 - g) potpis izdavaoca naloga i otisak pečata;
 - h) pouku subjektu nadzora da ometanje inspektora u radu predstavlja prekršaj.
- (4) Ako više inspektora iz nadležnosti Inspektorata Federalne uprave istovremeno vrši inspekcijski nadzor kod istog subjekta nadzora, svakom inspektor pojedinačno se izdaje za inspekcijski nadzor za oblast koju nadzire.

Član 22.

(Osiguranje uslova za nesmetano vršenje inspekcijskog nadzora)

(1) Prije otpočinjanja inspekcijskog nadzora federalni inspektor koji vrši nadzor dužan se predstaviti rukovodiocu subjekta nadzora kod kojeg se vrši inspekcijski nadzor, pokazati iskaznicu inspektora i predočiti nalog za vršenje inspekcijskog nadzora, odnosno upoznati ga sa ciljem, sadržajem i metodom rada, te pitanjima koja će biti obuhvaćena inspekcijskim nadzorom.

(2) Protiv naloga za inspekcijski nadzor ne može se izjaviti posebna žalba.

(3) Nakon upoznavanja sa pitanjima iz stava (1) ovog člana, federalni inspektor zatražit će da se odredi službeno lice koje će prisustvovati vršenju inspekcijskog nadzora ispred subjekta nadzora, nakon čega pristupa vršenju planiranog inspekcijskog nadzora.

(4) Subjekti nadzora kod kojeg se vrši inspekcijski nadzor, dužan je federalnim inspektorima obezbjediti sve potrebne uslove za nesmetano vršenje inspekcijskog nadzora, kao i pripremiti na uvid dokumentaciju i to:

a) za inspektora za zaštitu od požara dokumentaciju iz člana 14. ovog pravilnika te obezbjediti uslove za obilazak i pregled instalacija, uređaja, opreme, odnosno tehničkih i drugih mjera koje se odnose na zaštitu od požara iz člana 12. ovog pravilnika;

b) za inspektora za vatrogastvo dokumentaciju iz člana 15. ovog pravilnika i obilazak objekata, vozila, opreme i drugih sredstava i prostora koji se odnose na vatrogastvo utvrđenih u toj odredbi.

(5) Subjekti nadzora iz stava (1) ovog člana, dužni su na traženje federalnih inspektora, obezbjediti kopije određene dokumentacije koja je predmet inspekcijskog nadzora za potrebe inspektora.

(6) Ako se federalnim inspektorima u vršenju inspekcijskog nadzora onemogućava vršenje nadzora, ili pruži fizički otpor, ili ako taj otpor osnovano očekuju, ili postoji ozbiljna prijetnja, federalni inspektori mogu zatražiti pomoć od nadležne policije, a policija je obavezna pružiti potrebnu zaštitu i omogućiti federalnim inspektorima da izvrše inspekcijski nadzor u skladu sa Zakonom.

Član 23.

(Sačinjavanje zapisnika o izvršenom inspekcijskom nadzoru)

(1) Nakon završenog inspekcijskog nadzora federalni inspektori dužni su sačiniti zapisnik o izvršenom inspekcijskom nadzoru (u daljem tekstu: zapisnik), svako iz okvira svoje nadležnosti.

(2) Zapisnik sadrži podatke utvrđene u čl. 73. do 77. ZUP-a, s tim što se u zapisniku obavezno unose i sljedeći podaci:

a) naziv i adresa subjekta nadzora kod kojeg se vrši inspekcijski nadzor (prema potrebi mogu se navesti i drugi podaci), a za subjekt nadzora koji je pravno lice može se navesti kada je osnovano i kod kojeg je suda registrovano i slično;

b) podaci o rukovodiocu subjekta nadzora i za službeno lice koje je određeno da prisustvuje vršenju inspekcijskog nadzora (ime i prezime, datum rođenja, mjesto i država rođenja, broj lične karte i od koga je izdata);

c) datum i vrijeme izvršavanja inspekcijskog nadzora;

d) vrsta nadzora (redovni, vanredni, kontrolni, potpuni, djelimičan);

e) naziv dokumentacije u koju je izvršen uvid prilikom inspekcijskog nadzora uz navođenja broja, datuma i subjekta od kojeg je izdat dokument, kao i podatke koji se odnose na objekte, prostorije, instalacije, uređaje, opremu, sredstva i drugo, koji su bili predmet pregleda u građevini i prostorima subjekta nadzora;

f) navesti šta je utvrđeno inspekcijskim nadzorom, sa potpunim i tačnim opisom činjeničnog stanja koje je nadzorom utvrđeno, naročito onog koji predstavlja određenu nezakonitost, a prema potrebi navesti i druge činjenice;

g) pouka da se protiv zapisnika ne može koristiti pravni lijek.

(3) Zapisnik potpisuje federalni inspektor koji je obavio inspekcijski nadzor i službeno lice koje je određeno da prisustvuje izvršavanju inspekcijskog nadzora ispred subjekta nadzora.

(4) Zapisnik se izrađuje u tri istovjetna primjerka od kojih se jedan uručuje subjektu nadzora, a ostala dva ostaju inspektorima koji je obavio inspekcijski nadzor.

Član 24.

(Rješenje kojim se naređuje otklanjanje utvrđenih nedostataka i nepravilnosti)

(1) Sve upravne i druge mjere za otklanjanje nedostataka i nepravilnosti u okviru svoje nadležnosti, federalni inspektor naređuje rješenjem.

(2) Rješenje kojim se naređuje otklanjanje utvrđenih nedostataka i nepravilnosti izrađuje se prema odredbama čl. 204. do 208. ZUP-a.

(3) Rješenjem iz stava (1) ovoga člana:

a) federalni inspektor za zaštitu od požara može narediti svaku mjeru kojom će se osigurati pravilno postupanje u primjeni Zakona i podzakonskih propisa donesenim na osnovu tog zakona, odnosno kojom će se spriječiti ili svesti na najmanju mjeru mogućnost izbijanja i širenja požara;

b) federalni inspektor za vatrogastvo može narediti svaku mjeru kojom će se osigurati pravilno postupanje u primjeni Zakona i podzakonskih propisa donesenim na osnovu tog zakona, odnosno kojom će se otkloniti ili spriječiti nastanak negativnih posljedica za pitanja iz oblasti vatrogastva i vatrogasne djelatnosti.

(4) Rješenje i mjere iz stava (3) ovog člana donose se na osnovu podataka koji su sadržani u zapisniku iz člana 23. ovog pravilnika.

(5) U skladu sa članom 147. Zakona, protiv rješenja iz stava (1) ovog člana, može se izjaviti žalba direktoru Federalne uprave, koja se rješava na način utvrđen u toj zakonskoj odredbi.

Član 25.

(Prekršajni postupak i krivična prijava)

(1) Zahtjev za pokretanje prekršajnog postupka, odnosno krivična prijava za krivično djelo podnosi se u sljedećim slučajevima i to:

a) zahtjev za pokretanje prekršajnog postupka podnosi se kada se utvrdi da je učinjen prekršaj iz odredaba čl. 166. do 169. Zakona i prekršaj iz člana 149. stav 1. tač. 8. i 9. i člana 150. stav 1. tač. 13. i 14. Zakona o upravi;

b) krivična prijava se podnosi kada se utvrdi da postoji osnova sumnje da je izvršeno krivično djelo predviđeno Krivičnim zakonom Federacije Bosne i Hercegovine ("Službene novine Federacije BiH", br. 36/03, 37/03, 21/04, 69/04, 18/05, 42/10, 42/11, 59/14 i 76/14).

(2) Zahtjev za pokretanje prekršajnog postupka sastavlja se prema odgovarajućim odredbama Zakona o prekršajima Federacije Bosne i Hercegovine ("Službene novine Federacije BiH", broj 63/14), koje se odnose na sadržaj tog zahtjeva, dok se krivična prijava sastavlja prema odgovarajućim odredbama Zakona o krivičnom postupku Federacije Bosne i Hercegovine ("Službene novine Federacije BiH", br. 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13 i 59/14), koje se odnose na krivičnu prijavu.

(3) Zahtjev za pokretanje prekršajnog postupka podnosi se nadležnom sudu, a krivična prijava podnosi se nadležnom tužilaštvu.

Član 26.

(Upoznavanje rukovodioca subjekta nadzora o nađenom stanju)

Nakon završenog inspekcijskog nadzora, federalni inspektor ima obavezu da usmeno upozna rukovodioca subjekta nadzora o nađenom stanju i uruči primjerak zapisnika o izvršenom inspekcijskom nadzoru.

Član 27.

(Sačinjavanje izvještaja o izvršenom inspekcijskom nadzoru)

(1) Federalni inspektor je dužan izraditi godišnji izvještaj o izvršenim inspekcijskim nadzorima (u daljem tekstu: Godišnji izvještaj), nađenom stanju i problemima utvrđenim iz oblasti zaštite

od požara, odnosno iz oblasti vatrogastva te o drugim pitanjima koja su bila predmet inspekcijskog nadzora.

(2) Godišnji izvještaj iz stava (1) ovog člana sadrži sljedeće podatke:

- a) pregled subjekata nadzora iz člana 9., odnosno člana 10. ovog pravilnika, u kojima je izvršen inspekcijski nadzor i vrijeme izvršenja tog nadzora;
- b) pregled dokumentacije, odnosno objekata, instalacija, uređaja, opreme, sredstava i drugo, koji su bili predmet inspekcijskog nadzora sa konstatacijom o stanju iz oblasti zaštite od požara, odnosno iz oblasti vatrogastva;
- c) pregled mjera i aktivnosti koje bi subjekt nadzora trebalo preduzeti radi otklanjanja utvrđenih nedostataka i nepravilnosti i rok u kojemu bi trebalo provesti te mjere i aktivnosti;
- d) najznačajnije pojedinosti utvrđene inspekcijskim nadzorom, sa potpunim i tačnim opisom činjeničnog stanja, posebno u dijelu koji predstavlja određenu nezakonitost, a prema potrebi navesti i druge činjenice;
- e) poseban osvrt na pitanja koja nisu riješena ili su nepravilno ili pogrešno riješena u građevinama i prostorima subjekta nadzora;
- f) ukupan broj izdatih rješenja kojima su naređene mjere za otklanjanje utvrđenih nepravilnosti i nedostataka;
- g) ukupan broj pokrenutih prekršajnih postupaka, odnosno krivičnih prijava za pokretanje krivičnog postupka;
- h) pregled mjera i aktivnosti za unapređenje stanja iz oblasti zaštite od požara, odnosno iz oblasti vatrogastva na području Federacije.

(3) Prema potrebi, ili na zahtjev direktora Federalne uprave ili glavnog inspektora, inspektor izrađuje i šestomjesečni izvještaj o izvršenim inspekcijskim nadzorima u tom periodu koji sadrži podatke iz stava (2) ovog člana koji su bili predmet inspekcijskog nadzora.

Član 28.

(Dostavljanje izvještaja)

(1) Godišnji izvještaj federalnog inspektora iz člana 27. ovog pravilnika, dostavlja se glavnom inspektoru ili direktoru Federalne uprave ukoliko glavni inspektor nije postavljen.

(2) Izvještaj federalnog inspektora iz stava (1) ovog člana, sastavni je dio zbirnog godišnjeg izvještaja o izvršenim inspekcijskim nadzorima iz nadležnosti Inspektorata Federalne uprave u skladu sa odredbama Zakona i Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10), koji se podnosi Vladi Federacije Bosne i Hercegovine.

Član 29.

(Obavještavanje o povredi propisa iz nadležnosti druge inspekcije ili drugog organa uprave)
Ako u toku vršenja inspekcijskog nadzora, federalni inspektori utvrde da postoji povreda propisa iz nadležnosti druge inspekcije ili drugog organa uprave, dužni su o tome odmah, bez odlaganja, pismeno obavijestiti nadležnu inspekciju, odnosno nadležni organ uprave.

DIO PETI - PROPISI KOJI SLUŽE ZA VRŠENJE INSPEKCIJSKOG NADZORA

Član 30.

(Propisi potrebni za vršenje inspekcijskog nadzora)

Za vršenje inspekcijskog nadzora iz oblasti zaštite od požara iz člana 12. odnosno iz oblasti vatrogastva iz člana 13. ovog pravilnika, svaki federalni inspektor je dužan koristiti sljedeće propise:

- a) Zakon i podzakonske propise koji su doneseni na osnovu tog zakona,
- b) Zakon o organizaciji organa uprave,
- c) ZUP,
- d) Zakon o prekršajima,
- e) Zakon o krivičnom postupku te Krivični zakon iz člana 25. ovog pravilnika,
- f) standarde i normative iz oblasti zaštite od požara, odnosno vatrogastva koji donose nadležni organi Bosne i Hercegovine i Federacije,

g) ovaj pravilnik.

DIO ŠESTI - PRIPREME I STRUČNO OSPOSOBLJAVANJE INSPEKTORA ZA VRŠENJE INSPEKCIJSKOG NADZORA

Član 31.

(Pripreme inspektora za vršenje inspekcijskog nadzora)

- (1) Svaki federalni inspektor je dužan redovno obavljati pripreme za obavljanje inspekcijskog nadzora i proučavati propise iz člana 30. ovog pravilnika koji se odnose na pitanja koja su predmet inspekcijskog nadzora.
- (2) Pripreme iz stava (1) ovog člana obuhvataju upoznavanje sa Programom i sa pitanjima koja su predmet inspekcijskog nadzora, te sa načinom izvršenja mjesečnih planova rada inspekcijskog nadzora.

Član 32.

(Stručno osposobljavanje federalnih i kantonalnih inspektora)

- (1) U cilju stručnog osposobljavanja inspektora za jedinstvenu i pravilnu primjenu propisa u oblasti zaštite od požara i oblasti vatrogastva, Federalna uprava najmanje jednom godišnje organizuje obuku za federalne inspektore iz člana 6. stav (1) ovog pravilnika i kantonalne inspektore iz člana 148. stav 1. Zakona.
- (2) Stručno osposobljavanje inspektora iz stava (1) ovog člana vrši se prema Planu i programu stručnog osposobljavanja i usavršavanja inspektora koji donosi direktor Federalne uprave u skladu sa odredbom člana 129. stav 7. Zakona.

DIO SEDMI- SADRŽAJ I NAČIN VOĐENJA EVIDENCIJE O IZVRŠENOM INSPEKCIJSKOM NADZORU

Član 33.

(Evidencija o inspekcijskom nadzoru)

- (1) Federalni inspektori dužni su voditi evidenciju o izvršenim inspekcijskim nadzorima.
- (2) Evidencija iz stava (1) ovog člana vodi se u knjizi evidencije o izvršenim inspekcijskim nadzorima (u daljem tekstu: Knjiga evidencije), koja se izrađuje prema obrascu koji se nalazi u prilogu ovog pravilnika i čini njegov sastavni dio.
- (3) Knjiga evidencije iz stava (2) ovog člana vodi se u vidu posebne knjige formata A-3, sa tvrdim povezom tamnoplave boje, koja treba biti ostraničena, uvezana i ovjerena pečatom i potpisom rukovodioca Federalne uprave i čuva se trajno.
- (4) Knjigu evidencije iz stava (2) ovog člana vode federalni inspektori iz člana 6. ovog pravilnika, svako za izvršeni inspekcijski nadzor iz svoje nadležnosti.

DIO OSMI - INSPEKCIJSKI NADZOR IZ NADLEŽNOSTI KANTONALNE UPRAVE CIVILNE ZAŠTITE

Član 34.

(Primjena ovog pravilnika na kantonalne inspekcije)

- (1) Odredbe ovog pravilnika analogno se primjenjuju na vršenje inspekcijskog nadzora iz oblasti zaštite od požara i oblasti vatrogastva iz nadležnosti kantonalne uprave civilne zaštite utvrđen u članu 148. Zakona.
- (2) Pri vršenju inspekcijskog nadzora iz stava (1) ovog člana, kantonalni inspektori imaju ovlaštenja utvrđena u članu 149. Zakona, propisima iz člana 30. ovog pravilnika i kantonalnim propisima iz oblasti zaštite od požara i vatrogastva.
- (3) U skladu sa odredbama člana 149. stav 3. Zakona, protiv rješenja kantonalnog inspektora za zaštitu od požara, odnosno kantonalnog inspektora za vatrogastvo, koja se donose u pitanjima iz člana 148. Zakona, može se izjaviti žalba nadležnoj federalnoj inspekciji iz Federalne uprave, koja se rješava prema članu 149. st. 3. i 4. Zakona.

Član 35.

(Saradnja federalnih i kantonalnih inspektora)

- (1) Federalni inspektori dužni su pružati stručnu pomoć kantonalnim inspektorima zaštite od požara i kantonalnim inspektorima za vatrogastvo iz nadležnosti kantonalne uprave civilne

zaštite u pitanjima pravilnog vršenja inspeksijskog nadzora iz njihove nadležnosti, sa ciljem da se ujednači praksa u primjeni Zakona i podzakonskih propisa na području Federacije.

(2) U odnosu na međusobne odnose federalnih i kantonalnih inspektora postupa se prema odredbama čl. 133. i 134. Zakona o organizaciji organa uprave.

DIO DEVETI - PRELAZNE I ZAVRŠNE ODREDBE

Član 36.

(Stupanje na snagu pravilnika)

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

